



Band 1. Von der Reformation bis zum Dreißigjährigen Krieg 1500-1648

Verteidiger des alten Glaubens in der Schweiz – Die Artikel der neun Kantone (1525)

In keinem Teil des Reiches stellten sich die örtlichen Regierungen so schnell und so entschieden dem neuen Glauben entgegen wie in der Schweizer Konföderation. Die Frage spaltete die Bundesversammlung (Tagsatzung) und stürzte sie an den Rand eines Krieges (1529) und schließlich in einen Krieg (1531). Zu diesem Zeitpunkt bestand die Konföderation aus dreizehn vollwertigen Mitgliedern oder „Orten“: Uri, Schwyz, Unterwalden, Luzern, Zürich, Zug, Glarus, Bern, Solothurn, Freiburg, Basel, Schaffhausen und Appenzell, sowie mehreren Verbündeten und zwei autonomen verbündeten ländlichen Republiken, Valais und Graubünden. Bei einer Versammlung in Luzern 1525 erklärten die Abgeordneten von neun Orten ihren Protest gegen die religiösen Neuerungen und bekundeten ihre Entschlossenheit, den alten Glauben zu erhalten und gegen die evangelische Agitation und Angriffe zu verteidigen. Im Allgemeinen wurden die größeren Schweizer Stadtstaaten (Zürich, Basel und Bern) protestantisch, während die älteren, weniger kommerziell entwickelten Orte am Katholizismus festhielten und die autonomen ländlichen Republiken gemischt waren.

Dis sind die artickel von der nün ortten potten, sampt vnnsern lieben eidtgnossenchaft von Wallis potten, vff dem tag zu(o) Lucernn gsetzt vff ein hindersich bringen vnnd gfallen vnnserr herrn vnnd obernn. Actum vff Sambstag dem xxviii^{ten} tag Januarÿ, Anno Etc. xxv^o

Diewil es leider dar zu(o) komen durch der Lutterischen oder Zwinglischen, ouch andrer anhangern, predgern, schriben vnnd leren, das an vil ortten vnnd ennden vnnd bsunder in vnnserr eidtgnossenchaft, vnnserr alltter, warer kristenlicher gloub in vil articklen—vnnd bsunder die h[eiligen] sacrament, ouch die hochwirdigest jungkfrow vnnd die lieben helgen—gezweÿet, veracht vnnd verspottet, der kristenlichen kilchen heilig ordnung satzung vnnd die pen vnnd Sträff, so den übertrettern gsetzt, gott veracht vnnd nitt mer sind. Damitt vnnd nitt also der möntsch (der doch allweg mer zu(o) übell vnnd sunden dann zu(o) gu(o)ttten gneigt) gar verru(o)cht on forcht vnnd straff nach sinen bösen mu(o)tt willen lebe, vnd damitt nitt ein jeder jmen nach sinen kopf vnnd verstand einen glouben schöpf vnnd fürnem. So doch dise irrung gar gross in die welt erwachsen, vnnd der oberst vnnd geistlich hirtt der kirchen vnnd die geistlich oberkeitt in disen sorgen vnnd nötten schwigent vnnd schlaffent, hatt vnns eidtgenossenschaft fur gu(o)tt vnnd nottwendig angsehen, fürkommnis vnnd insechung zethu(o)n, damitt wir vnd die vnnserrn, so vnns verwandt vnnd zu(o) versprechen zu(o) stand, von sollcher sect, missglouben vnnd übell nitt vergiffet vnnd verfu(e)rtt werden.

Darvmb, so habent wir dise nach gescribnen artickell gsetzt vnnd die zu(o) halltten vffgnomen, biß vff die zitt, das söllich irrung vnnd zwÿtracht, so jetz im glouben ist, durch mittel eins

gmeinen kristenlichen conciliums oder durch annder treffenlich gnu(o)gsamlich cristenlich versammlung, dar inn vnnsere pottschaften ouch beru(e)fft vnnd dar by sind, abgestellt, erlüttert vnnd wider einigkeit in der kilchen gmacht wird, das jederman weiß, war an er ist. Alls dann wir aber thu(o)n wöllent, alls fromen gu(o)tten kristen zu(o) statt.

Zum ersten, das mengklich, Es sigent geistlich oder weltlich, sich massen vnnd verhu(e)tten sol, werder mitt wortten noch schriffen, gar nicht zereden, ze disputtieren, zescriben noch in keinen weg anzefechten die zwölff stuck vnnsere waren kristenlichen gloubens, vss dem waren gotts wortt von kristenlicher kilchen angnommen vnnd allweg gehalten.

Witer, das sich mengklich verhu(e)tten vnnd vermeiden sol, wider die heilige sibene sacrament von cristo vnnsere bhaltter, ouch vss sinen wortt, von der heiligen kristenlichen kilchen vff gesetzt, niemer nitt zereden, zescriben noch da von zu(o) disputtieren in keinen weg, sunder sich mengklich vnnd ein jeder kristenlich möntsch flissen sol, die zu(o) erwirdigen, zeglouben vnnd zehaltten, on alls mittell einicher zwiffnung, wie dann die kristenlich kilch geordnott vnnd bißhar gehalten hatt.

Item, es so sich ouch niemant vnderstan, noch in sin gmu(e)tt vnnd fürnemen setzen, die heiligen sacrament—bsunder das opfer der helgen ma(e)ss—mitt all ir ordnung anders zebuchen, ze v(e)ben vnnd mitt zu(o)teilen, dann wie die kristenlich kilch das vffgesetzt geordnott vnnd bißhar gehalten hett.

Die helgen sacrament sollent ouch vnns lejen mittgeteiltt, gebrecht vnnd gehalten werden, wie die von der kristenlichen kilchen vffgesetzt vnnd allweg bißhar brucht ist.

Es sol ouch kein leysch möntsch zu(o) dem hochwirdigen sacrament dess altars on vorgende bicht vnnd absolution nach form der kilchen nitt zu(o) gan, ouch nitt vnnder beder gestallten wider ordnung kristenlichen kilchen begeren oder zenemen sich vnderfachen.

Wir wöllend ouch jetz in andern der kristenlichen kilchen ordnungen, satzungen vnnd gu(o)tten loblichen brüchen—als fasten, betten, bichten, büßwürcken, singen vnnd lesen, krüztfert, opfern vnnd andre cerimonia etc.—kein endrung thu(o)n, sunder sol es damitt gehalten werden, wie d[a]ß alles von den h[eiligen] vättern vss dem gotzwortt har fließende vnnd andern vnnsere vordern loblich an vnns komen ist.

Diewil ouch der altbruch mitt fleisch vnd andern verpottnen spisen zu(o) essen in der vasten vnnd andern verpottnen tagen vss gu(o)tten vernünftigen kristenlichen vss der heiligen gschriftt gegründten vrsachen durch die heilige vätter vffgesetzt vnnd nach jedes lanndts bruch vutz biß an vnns loblich har komen ist, so wöllend wir die ergernüss, so vss übertretung der selbigen vffsatzungen entstatt, in vnnsere stetten, (*stricken*: vnnd) lannden vnnd gepietten nitt infu(e)ren lassen, sunder halltten wie von alterhar vnd die übertre(e)ttter darvmb straffen nach jedes ortts ordnung vnnd gfallen, wie dann vor ouch zu(o) tagen verabscheidet ist.

Item, wir wöllendt ouch nitt gedulden noch liden, das niemant die helgisten jungfrow Marien, ouch alle gottes helgen, schmechen noch enteren. Sunder wie all vnnsere vordren vnd die kristenlich kilch allweg gehallten gu(e)ttlich glouben, das vnnsere liebe frow, ouch annder lieb helgen, mitt ir für pitt gegen gott vns wol erschiessen vnd gnad erlangen mogen. Welcher möntsch ouch hie widerredt oder tätte, der sol ouch grösslich darvmb gsträfft werden, nach siner herrn vnnd obern erkanthüss.

Item, es sol sich ouch niemant vnderstan, die Bildnüssen vnd figuren vnnsere herrn, vnnsere lieben frowen, dess crucifixs, noch annder lieben helgen weder in den kilchen capellen, bildhüsern oder an andern ortten vnnd enden zu(o) schmächen, dar vss zethu(o)n, zu(o) zerbrechen oder sust vner anzethu(o)n. Sunder das man die gotzhüser vnnd kilchen vnd all kilchen zerden loblich bruch vnnd har komen bliben lassen sol, wie das von alter her gewesen vnnd an vnns komen ist.

Item, alls dann vil zweyung vnnd widerwertigkeitt durch die predicanten vss iren predgen vnnd leren allenthalb erwachsen ist, vnnd damitt samlichs, so vil vnnsere vermogens, nitt der gotts hillff abgesteltt vnnd verhu(e)tt werde. Vnnd das heilige ewangelium, das gotts wortt, vnd die heilige gschrift in rechten verstand, wie dann die helgen alten lerer vil loblichen gegründter bu(o)chern hinder inen verlassen vnnd den rechten waren kristenlichen verstand dess gotts worttes vnnd der helgen gschrift grundtlich erkleret vnnd anzögt habent, vnnd vnnsere gemeinen man allenthalb einhelliglich gepredget fürghallten vnnd glertt werden, so ist vnnsere ordnung vnnd ernstlich meinung, d[a]ß allenthalb in vnnsere stetten, Amptern, gerichten, oberkeiten vnd gepietten, vnnd wo wir zu(o) regieren hand, nieman das gotts wortt vnnd die heilige gschrift predgen vnnd leren sol, Er sÿ dann von sinen geistlichen ordinarien vor examiniertt, dar zu(o) togenlich vnd gnu(o)gsamm erkennt vnd hab des gloublichen schin dar zu(o) von der weltlichen oberkeit, an welchen ortt es ist im das ouch zu(o) glassen. Vnnd sol kein winckel predger nitt gestattett werden.

Dis selben predicanten, so also in vnnsere lannden vnnd gepietten vnns vnnd den vnnsere predgen wellendt, söllent ouch d[a]ß h[eilige] ewangelium, die heilige gschrift, das nÿ vnnd alt testament nach rechten, waren verstand, wie dann die helgen alten lerer an zweiffel vss dem geist gottes gethan, so die kristenlich kilch angenommen vnnd ir ler zu(o) gelassen hätt, predgen, leren vnnd vnderweisen, añ allen gitt. Vnnd darinn nitt anders su(o)chen noch ansechen, dann der selen heil vnnd bessrung hie in zitt vnnsere liebens, vnnd da bÿ sich verhu(e)ttten, sust annder stempfnÿen vnnd vmbstenden, ouch aller lerer, so von der kilchen nitt zu(o) glassen vnnd mitt der heiligen gschrift nitt gleichförmig sind. Vnd bsunder das ein jeder predicant das gotts wortt vnnd die heilige gschrift noch sinen verstand da hin nitt bucken, noch dermass predgen, damitt söllich sin ler wider die heiligen sacrament, wider die er gotts, wider vnnsere lieben frowen vnnd die lieben helgen vnnd wider kristenliche kilchen sÿent, als jetz leider an vil ortten geschicht.

Dann wo ein söllicher predger gespürtt vnnd von ime ghörtt wurde, das er vff söllich verfu(o)risch meinung vnnd den nÿwen missglouben predgte, sol er von siner weltlichen

oberkeitt, an welchen ortt es ist, agbstelltt, da dannen vertriben vnnd gethan [er möcht ouch so frefeulich gehandeltt haben), darvmb nach sinen beschulden gestrafft werden.

Item, als dann von wegen dess fegfurs, ouch der fürpittung der abgestorbnen aller vnns vordren vnnd aller kristglobigen selen, so vnnsern vordern vnd wir bißhar wärlich gloubt, ouch durch die heilige lerer durch d[a]ß alt vnnd nūw testament gnu(o)gsam-anzöngung habent, vnnd ouch in vil concilien durch die heilige gschrift bewertt vnd erfaren, vnnd also die kristenlich kilch zehalltten bestättiget vnnd allweg bißhar gehalltten hätt. Da aber durch die luttersch oder zwinglich sect mitt vngrund faltscher meinung etwas missgloubens vnnd widerred vfferweckt ist, des halb wir mengklich warnent, nitt so lichtvertigklick vff der lutterschen vngegründt falsch fürgeben von vnnsern wärem glouben zestan, wöllendt ouch das söllichs niemant in vnnsere oberkeitt predge, schrib oder sag. Dann wer das tha(e)tt, sol darvmb nach jedes hrrn vnnd obern oberkeitt erkanntnūs gestrafft werden.

Item, wir setzent vnnd wellendt ouch, d[a]ß mengklich die gotzhüser klöister stiftunngen vnnd kilchen by iren alten frýheitten, rechten, gerechtikeitten vnnd wie si von alltter har komen sind, bliben lassen sol, vnnd kein gwalltt mitt inen brochen noch inrn d[a]ß iren vorhalltten, noch nemen mitt eignem gwalltt an recht. Dann wer das tätt, sol von siner oberkeitt je nach gstattt der sach treffenlich darvmb gstrafft werden.

[*Randnotiz:* disn artickel ist wider die vordrigen Artickel all, dann die vordrigen luten, man sol belibinn by der alten satzungen, cerimonien etc.]

Item, wie wol war mag sin, das durch die h[eiligen] vätter lerer, ouch durch die bápst vnnd concilien, die geistliche- recht, vil ordnunngen vnnd satzungen gu(o)tter meinung vff gesezt vnnd gmacht, je doch so sind söllich geistliche recht vnnd satzung nach vnnd nach gemeret, gestrengert vnd so vberflüssig vil worden, die ouch wider vnns leyen zum dickermal missbrucht, so vnns leyen zum dickermal zu(o) grossen nachteil vnnd verderbung dienen vnnd andrer gstattt gegen vnns gebrucht werden, weder d[a]ß sin sölte. Vnnd diewil jetzund zu(o) der sorgklichen zitt, so der wolff in dem schaffstal cristi die schäffli schedlich zerströwt, [vnnd] der oberst wechter vnnd hirtt der kilchen schlafft, so wil vnns gepüren, als der weltlichen oberkeitt, vnns selber in ettlichen weg zehillff zekomen, damitt wir vnnd die vnnsern wider zu(o) einhelligkeitt koment vnnd by dem waren glouben blibent, ouch vnns vss vil beschwärdten selber hellffen. Nitt das wir darvmb vnns gar von der römschen ouch gmeinen kristenlichen kilchen abwerffen noch widersetzen wöllent, sunder allein zur nidertruckung vnnd verthu(e)ttung wilers vnvals, vnghorsämm ouch zertrennung vnnsere eidtgnoschaft. Namlich das böß vnd übel zu(o) fürkomen vnd zu(o) lob nutz vnnd er vnnsere eidtgnoschaft, so habent wir diss ordnung vnnd artickell zu(o) halltten vffgnomen. Doch mitt der protestation vnnd erpiettung wie vorstätt, wann durch ein gmein kristenlich concilium, oder gnu(o)gsammlich versammlung, da vnnsere eidtgnoschaft pottschaftten ouch beru(e)fft vnnd dar by sind, söllich zwýtracht hinweg gethan, vnnd wider in der kilchen einigkeitt gemacht werd, wöllendt wir vnns von der kilchen nitt gsündertt haben, sunden th(o)n, wie vnnsere vordren als gu(o)tt fromm ghorsamm kristen lütten.

Zum ersten, das vnnsere lüttprister vnnd selsorger sich nitt vff den gitt leggen, wie vor har vil beschechen. Namlich, d[a]ß si vnd ir hellffer die heiligen sacrament vnns vnnd den vnnsern nach cristenlicher ordnung mitteilen vnnd vnns die von gellts wegen nitt verhallten söllent.

Doch da by ist vnnsere ordnung vnnd meinung, was an jeden ortt vnnd end die pfärrlichen recht sind. Vnnd was der bruch ist vnnd einen pfarrer von alltter har zu(o) ghörtt hatt, das sol inn ouch verfolgen vnnd werd nach zimlichen bscherdnen dingen. Ob aber ein lüttpriester oder sine hellffer dar inn zestreg vnnd gfärlich hanndlen wöllten, so sol das stan an der weltlichen oberkeitt, in welcher statt vnnd lannd vnnd in welchen ortt er ist, die mogen dar inn hanndlen, je noch gstatlt der sach, damitt der gmein man / nitt übereissen werd.

Item, das ouch die priester, was stätts die sind, sich erberlich, franklich vnnd wol hallten, den stiftungen irer pfru(o)nden, ouch der regel vnnd ordnung irer gothüsern, trülich gelebet vnnd nach koment; sich aller leyschen wandels wäsens, kleidung vnnd annderer vnerberlichen wonungen abthügent; vnns leyen ein froms, erbers gu(o)tts exempel vortragent; vnnd sich dermassen dar in schicken, damitt kein klag von inen koment. Dann man nitt fürhin nitt von inen liden noch vertragen wird, als man bißhar than hatt. Darnach wiss sich ein jeder zerichten.

Item, es sol ouch ein jeder pfarrer in tods nöttten by sinen vnnderthanen bliben, die selben trülich nach kristenlicher ordnung versechen vnnd trösten, by verliering siner pfru(o)nd.

Item, welcher priester es pfarrer chorher oder caplan ein pfru(o)nd hatt, die sol er selb besitzen vnnd versechen; vnnd sol fürhin niemant, er sig, wer er wöll, kein absent von den pfru(o)nden nemen noch geben. Welcher aber nitt selbs vff der pfru(o)nd setzen vnnd versechen wil, oder nitt togenlich oder nitt geschickt dar zu(o) wäre, der sol die niemant übergeben dann sinen collator vnd lechen herrn, der ime die gleichen hatt,

Es sol ouch keiner vmb oberzellt absenten pfarren oder pfru(o)nden kein heimlichen vertrag mitt andern machen noch annemen / by (*stricken*: siner) verliering siner pfru(o)nd.

Ob aber sin junger ein pfru(o)nd hette, der noch vnnder jaren vnnd priester ze werden zejung wäre, dem mag wol vergönnt vnnd zu(o) glassen werden die nutzüng der pfru(o)nd, doch d[a]ß er die durch ein andern gscheckten priester alltt gnu(o)g ist. So verr er dann nitt priester wirdt oder nitt gscheckt vnnd togenlich dar zu(o) ist, sol ime die pfru(o)nd gnomen vnnd einen andern gscheckten, togenlichen priester gleichen werden.

Item, als darin sich jetzen ettlich priester vnderstand, eliche wiber zehaben, ist vnnsere meinung, das den selben, welche ewiber gnomen, kein pfru(o)nden gleichen, ouch ir priesterlich ampt verpotten werden sol.

Desglich, welcher priester, so mitt einer pfru(o)nd versechen, ein ewib nimpt, dem sol man sin pfru(o)nd nemen vnnd sin priesterlich ampt verpietten, das er sich darnach mitt siner arbeit, wie annder leyen ernerren sol.

Item, welche ordens lütt, wibs vnnd mans personen vss iren klöstern vnnd vss dem order sich thu(o)nd oder zu(o) der Ee griffent, dies selben söllent ouch ir pfru(o)nder vnnd irer gotzhüser beroubt sin; doch vorbehalltten jeden ortt vnnd in der oberkeitt das gschicht, witer mitt ime zehandlen, gnad oder nitt mittzu(o)teilen.

Item, von dess geistlichen gricht zwangs vnnd des banns wegen habent wir angesehen vnnd geordnet jetzmal diser zitt, diewil die löff so sorgklich stand, vnnd nieman nitt mer darvmb gitt, das dann kein geistlicher einen weltlichen, oder ein weltlicher ein-en geistlichen, noch kein ley den andern vff das geistlich gricht nitt citieren laden noch fürnemen sol; weder vmb gelltschulden, schmach henndel, noch freuel zu(o) reden, zins, zeenden, rent noch gülltt, noch vmb kein zittlich oder weltlich sachen dar inn nitt vssgnomen; allein vor behalltten die Esachen vnnd was irrung vnnd spans von wegen der h[eiligen] Sacramenten oder die gotzhüser [vnnd] kilchen beru(e)rendt, oder das, so die sel antrifft, oder irrung vnnd vnglaubens wegen etc., lassent wir für den geistlichen richter komen. Aber sust vmb all zittlich gu(o)tt vnnd möntschlich verhandlung, sol das geistlich gricht vnnd der bän gegen niemant gebrucht werden, sunder sol jettliche parthÿ die andern vmb ir zu(o)sprüch su(o)chen vnnd anlangen, in den grichten, da der ansprächig gessen oder wonhafft ist; vnnd daselbs recht geben vnnd nemen, wie dann ein gemein landsbruchen allenthalb ist / vnnd zumteil vnnsrt pündt das vss wisendt.

Ob sich aber fu(o)gte, das die vnnsern in Esachen oder sust andern geistlichen sachen, wie vor stätt in geistlich gricht kement, wellent wir doch, das der geistlich richter die sachen vff d[a]ß fürderlichost vnnd mitt dem mintsten kosten vsstrag vnd zu(o) ennd bring, damitt nitt also die armen lütt vmzogen vnnd zu(o) grossen kosten bracht werden, als vorhar der brüch gewesen vnnd beschechen ist. Dann wir söllichs nitt mer liden, vnnd wo vnns dess halb klag fürkomen vnnd mitt warheitt die vffzüg anzögt, wurden wir witer lu(o)gen, damitt den vnnsern ghullffen.

Es sol ouch vor dem geistlichen rechter, vnnd bsunder zu(o) Costentz, all grichts hendell in tütsch gehandelltt vnnd procediert vnnd in tütschen geschriben werd, als in ettlichen bistthumm mer der bruch ist, damitt wir leyen ouch hörent vnnd verstan koment, was man handle.

Item, der Curtisanen halb, so die pfru(o)nden anfallent, jst schlecht vnnsrer ordnung vnnd meinung, das an keinen ortt vnd end sol gestattet vnd zu(o) glassen werden, das einer dem andern also die pfru(o) anfallent. Vnnd wo söllich römsch buben koment, vnd die pfru(o)nden anfallen wöllent, söllent die dar vmb fengklich angnommen vnd dermass gestrafft werden, das man hernach vor inen sicher sig.

Item, wir habent ouch angesehen, vnd jst vnnsrer meinung, wenn jemants, sig man oder wib, in krankheitt oder tods notten ligt, das selbs kein geistlich person, weder priester, munch, nünnen, beginen noch ander den krancken zu(o)koment, testament oder verschaffung sins gu(o)ttis nit anziehen noch reitzen, on by sin dess selben rechten erben. Ob aber der krancker von eigner bewegnüss vnd willen, testament vnnd gmacht ordnen vnnd segen wölt, sol das

geschehen vor dryen leyschen mans personen oder nach bruch vnnd gwonheitt eins jeden ortt vnd ends, jederman sin recht hiemitt vorbehalten.

Item, wir wöllent ouch vnnd hand geordnott, wann ein gwichte geistliche person mitt einen weltlichen oder ein weltlicher mitt einen geistlichen in stoss vnnd zwÿtracht kompt, so söllent bedteil, der priester als wol als der ley, wenn man friden vordret, den friden geben vnnd nemen vnnd halltten, nach gemeinen lanndts bruch.

Item, als dann bißhar sich die preisterschaft zum teil ettlich gar vngschickt vnerberlich gehalten, böss misshandell vnnd sachen verbracht, vnnd wo sÿ leyen gewesen, so werent si an lib vnnd leben gestrafft. So aber söllich übeltatter den bischoffen jren ordenlichen obern überantwurt, sind si zu(o) zitten schechtlich gestrafft, vnnd den mertheil wider vss gfengknüss komen vnnd ledig worden. Vnnd die wil sich d[a]ß laster vnnd die freuelkeit vnder ime meret, vnnd wir gar nach all zwÿtracht vnd vnr(o)w von jnen hand, vnd damitt d[a]ß übell gestrafft werden, darvmb so habent wir geordnott, welcher priester oder sust gwicht personen, frowen oder man, söllich mass böß hendel, übeltätten vnd sachen begand, darvmb einer sin leben verwurckte, so sol ein jettliche weltliche oberkeit, vnder der ein söllicher geistlicher übeltätter ergriffen wird, die selben geistlichen person vmb jr misstatt straffen an lib vnd leben, wie einen leyen, vngangsehen die wiche.

Item, als dann vil grosser vnru(o)w entstanden ist, des gloubens halb, imm gmeinen man durch die truckerÿ vnnd die lutterschen oder zwinglischen vnnd anndrer irer anhenger getruckten bu(o)chli, ist vnnsere ordnung, das niemant söllche bu(o)cher in vnnsere stetten, lannden vnnd gepietten trucken noch veil haben sol. Sunder wo die bÿ einen bu(o)chfu(o)rer ergriffen, sol man grösßlich darvmb straffen. Vnd welcher söllche büchli ficht veil haben, vnnd er die dem kremer nimpt, zerisdt oder in d[a]ß rätt wirfft, der sol damitt nitt gefräffelltt han.

Item, als dann bißhar der gmein arm man äben mercklich von geistlichen prelaten vnnd gotzhüsern, ouch von edlen vnd vnedlen gericht herren, allenthalb mitt der eigenossenschaft hertt vnnd streng gehalten werden sind, mitt der vgnossamen fällen vnnd lassen vnnd anddern herlicheitten vnd gerechtikeitten.

Zum ersten, dess lässens halb, das jst wenn ein eigner mänsche abgätt on lib erben, obe er schon schwester und brüder hatt, die sine rechten vnd nächsten erben billich solten sin, nittdestminder so fartt sin hals her zu(o) vnd nimpt von der varenden hab, es sig lützel oder vil, den läss. Namich, so hatt ein gottshuß oder grichts herr nit ein bruce wie der annder, ettlich nement den halben teil der varenden hab, ettlich, ettlich den dritt teil, vnnd einer nitt alls der annder etc. Hiervff jst ouch vnnsere ordnung vnnd meinung, das fürhin kein läss sol geben noch gnomen werden.

Item, dess gleich, so jst ein bruch, glich wie der läss, daß man nimpt ein antragende hannd oder ein hagstoltz, oder wie das annders genempt werden mag. Also wann der eigenmönch an lib erben abgätt, vngangsehen sin schwester, brüder vnnd nächsten frund, so vnderstatt sin

halsherr die varenden hab gar zu(o) erben vnnd zu(o) nemen ettlich hhalb, eine nitt wie der annder. Hiervß jst ouch vnnsere ordnung vnnd meinung, das söllichs fürhin nit mer brucht werden sol.

Item, dess fals halb söllent die gotzhüser vnnd annder die armen lütt gar bscheidenlich halltten, vnnd besunder wo huß arm lütt sind von den selben zumwenigsten, so sÿ mogen nemen vnnd gnad mitt inen teillen. Dann wo es vnns mer zu(o) tagen zu(o) klag kemen, wie vormals off geschechen jst, so werden wir witer darinn hanndlen, damitt dem armen man in ettlich weg gehollffen vnd von söllicher bswärd entladen werden.

Item, der vngnosamin halb, das jst, wenn ein eigener mönsch wibet oder mannet vsserhalb sins halls herrn eignen luttten, so vnderstatt der halsherr ime darvmb zestraffen etc. Jst vnnsere ordnung vnnd meinung, das darinn niemant gestrafft werde, angesehen, d[a]ß die Ee ein sacrament jst, vnnd jederman in disem fal frÿ sol sin.

Item, vnd welscher eigen mönsch sich begertt, der eigenschaft von sinen herrn zu(o) erkouffen vnnd zu(o) ledigen, d[a]ß sol ime nitt abgeschlagen sunnder vergonntt werden, vmb ein zimlich geltt. Wo jm aber der herr zu(o) hertt damitt halltten, sol d[a]ß an jeden ortt vnnd end, wo d[a]ß jst, an der hohen oberkeitt stan, darinn zumittlen vnnd ze mässigen nach zimlich dingen.

Item, nach dem wir leyen von den geistlichen fürsten, prelaten, gotzhüsern, klöstern, stifften vnnd andern geistlichen lütten vil zitthar mercklich beschwärt vnnd getruckt worden sind, mit kouffung, gelegen vnnd zittlicher gu(o)tter zu(o) jren handen, darvmb, so setzent vnnd ordnen wir ouch jetzmal, das furhin kein gotzhuß, klöster noch anndre geistliche hüser, desglich annder geistlich herren, prelaten vnnd prsonen, kein glegen gu(o)tt, wie man d[a]ß nempt, nitt vssgenommen, zu(o) jren hannden kouffen söllent, Es sÿ dann sach, das jnen söllichs von der weltlichen oberkeitt, dar inn ein jeder gessen vnnd das gotzhus gelegen jst, verwilget vnnd zu(o) glassen. Suns sol inen das nitt gestattet werden.

Item, dess glich, das die gotzhüser, klöster, Stifftungen vnnd annder geistlich hüser in vnnsere eidtgnosschafft glegen kein summa geltts weder an ewig vnd ablosig zinnns anleggen, weder vsserhalb noch innerhalb der eidtgnosschafft an gnust, wissen vnnd willen der oberkeitt, dar inn d[a]ß selb gotzhuß oder stiftung gelegen jst.

Item, es sol ouch ein jettlich gotzhuß schludig sin, jürlich rechnung zu(o) geben der oberkeitt, dar inn es glegen jst, vnnd all dess gotzhuß innemen, vss geben vnnd vermogen vnnd aller handlungen.

Item, wir setzent vnnd orment ouch, welcher mönsch, er sig gesund, siech oder im todpett, ettwas durch gotts willen an die gottshusern, stiftungen, pfru(o)nden oder zu(o) der geistlichen hannden veordnen vnnd machen wöllent, das wir doch nitt werden, so sol ein jeder doch söllich gmacht von hannd frÿ geben vnnd ganntz nitt vff sine glegne gu(o)tter weder ewig noch ablosig zins noch gültt setzen, noch die gu(o)tter in einich weg beschweren. Vnd söllich hoptgu(o)tt, so

einer also vermacht, sol zu(o) dess gotzhuß weltlichen pfleger handen überantwurten, das vmb järlichen gülltt an zelegen, vnnd so dick es abgelösd, durch die weltlichen vogt vnnd pfleger wider vmb angelegt vnnd zum besten versehen werden sol.

Da by so habent wir ouch angesehen vnnd wöllent, das niemand dem andern das sin mitt gwalltt an recht vorhallt, sunder das jederman dem andern geben, bezal vnnd halltte, das so er ime schuldig, Es sig zinß, renntt, gülltt, klein vnnd gross zeenden, schulden ouch andrer herlicheitten vnd gerechtigkeitten, vnd wie das von alter har komen billich vnnd recht gesin jst. Ouch das alle die brieff sigel vnd verschreibung in krefftent blibent, vnnd was sie inhallten, trülich gehallten werden sol.

Vnnd zu(o) letst, jst hiemitt ouch vorbehallten eine jeden ortt vnnsere eidtgenoschafft vnd einer jeder oberkeitt, ob et war in siner oberkeitt mitt den geistlichen prelaten vnd personen, ouch mitt den gotshüsen, stiftungen, klöstern oder andern geistlichen hüsen etwas beschwärd, missbruch vnnd überlasts hettent vnd erlutendt, sol vnnd mag jettliche weltliche oberkeitt darvmb ouch insechen vnnd thu(o)n vnd nach zimlichen billichen dingen mittlen und abstellen. Doch das söllichs mittel den vorgeschribnen articklen in allweg vnabbruchig vnnd nit widertt syent.

Item, es sol jeder pott dise copy vnnd artickell vff nächsten tag gen Lucern mitt ime bringen.

Quelle des deutschen Originaltextes: Staatsarchiv Bern, A IV 23, S. 291-310, zur Verfügung gestellt von Peter Blickle (dem die Autoren danken), transkribiert von Carina L. Johnson, revidiert von Randolph C. Head basierend auf dem Text in *Amtliche Sammlung der älteren eidgenössischen Abschiede*, IV A, herausgegeben von Johannes Strickler. Brugg: Fisch, Wild und Comp., 1873, S. 569-80, dieser Abschnitt auf Seiten 572-78.